

8. gr.

Gjaldskrá þessi, sem samin er af svæðisnefnd heilbrigðiseftirlits á Vestfjörðum og samþykkt af hlutadeigandi sveitarfélögum, staðfestist hér með skv. 5. gr. laga nr. 109/1984 um hollustuhætti og heilbrigðiseftirlit ásamt síðari breytingum, til að öðlast gildi þegar við birtingu. Jafnframt fellur úr gildi gjaldskrá nr. 66/1986 með sama heiti.

*Ákvæði til bráðabirgða.*

Með skírskotun til sérstaks samkomulags og þar til annað verður ákveðið gildir gjaldskrá fyrir heilbrigðiseftirlit á Vesturlandi fyrir Austur-Barðastrandarsýslu.

*Heilbrigðis- og tryggingamálaráðuneytið, 13. júlí 1988.*

**Guðmundur Bjarnason.**

*Ingimar Sigurðsson.*

## SAMÞYKKT

### um hundahald í Breiðdalsvík, Suður-Múlasýslu.

1. gr.

Hundahald er bannað á Breiðdalsvík í Suður-Múlasýslu.

2. gr.

Sveitarstjórn er heimilt að veita lögráða einstaklingum, sem búa á Breiðdalsvík undanþágu frá 1. gr. með eftirfarandi skilyrðum.

- a) Leyfi er bundið við nafn og heimilisfang lögráða einstaklings og óheimilt er að framselja það.
- b) Ef sótt er um leyfi til að halda hund í sambýlishúsi, skal skriflegt samþykki sameigenda eða stjórnar húsfélags í húsinu fylgja umsókn, ef um leiguhúsnæði er að ræða skal fylgja umsókn skriflegt samþykki eiganda íbúðarinnar.
- c) Leyfisgjald vegna undanþágu skal greiða til sveitarsjóðs skv. sérstakri gjaldskrá sem sveitarstjórn setur árlega og heilbrigðisráðuneytið staðfestir. Skal gjaldið greitt í fyrsta sinn við skráningu hunds og síðan fyrirfram árlega með gjalddaga 1. mars. Hafi gjaldið eigi verið greitt innan mánaðar frá gjalddaga fellur leyfið úr gildi.
- d) Skylt er leyfishafa að hafa hundinn ábyrgðartryggðan og getur sveitarstjórn ákveðið að gera heildarsamning við tryggingafélag, eitt eða fleiri. Skal tryggingin ná til alls þess tjóns, sem dýrið kann að valda á mönnum, dýrum, gróðri og munum. Vottorð um ábyrgðartryggingu skal liggja fyrir við greiðslu leyfis og greiðslu árlegs leyfisgjalds.
- e) Hundar skulu færðir árlega til hreinsunar. Um hreinsun þeirra og gjald fyrir hana fer eftir reglugerð um varnir gegn sullaveiki nr. 201/1957. Framvísa skal vottorði um hreinsun við greiðslu árlegs leyfisgjalds.
- f) Leyfishafi skal gæta þess vel að hundur hans valdi ekki hættu, óþægindum eða óþrifnaði né raski ró manna. Hundar skulu ávallt vera í taumi utan húss. Leyfishafa er skylt að fjarlægja saur eftir hundinn á tryggilegan hátt.
- g) Eigi má hleypa hundum inn í almenningsfarartæki, leikvelli, matsölur og aðra veitingastaði, skóla, kennslustaði og barnaheimili, þar með talin sumardvalarheimili og dag-

vistarheimili, rakarastofur, hárgreiðslustofur, samkomuhús, kirkju og kirkjugarða svo og húsakynni þar sem framleidd eru eða seld matvæli og aðrar neysluvörur. Ef brotin eru skilyrði þessara greinar getur það varðað refsingu samkvæmt 7. gr.

3. gr.

Umsókn um leyfi til hundahalds skal senda skrifstofu Breiðdalshrepps sem gefur út leyfi að fengnu samþykki sveitarstjórnar. Upplýsingar um hundinn skal færa í þar til gerða bók hjá Breiðdalshreppi. Þar skal skrá heiti, aldur, kyn, tegund, litarhátt og önnur einkenni hundsins. Þar skal einnig skrá nafn og heimilisfang leyfishafa.

Senda skal embætti sýslumanns S-Múlasýslu og heilbrigðisnefnd afrit af leyfisbréfi.

4. gr.

Ef leyfishafi brýtur gegn ákvæðum samþykktar þessarar eða öðrum reglum, sem um hundahald gilda, getur sveitarstjórn afturkallað leyfið.

Einnig getur sveitarstjórn afturkallað öll leyfi til hundahalds telji hún þess þörf.

5. gr.

Heilbrigðisnefnd eða aðilar á hennar vegum annast eftirlit með hundahaldi í Breiðdalsvík og getur leitað aðstoðar lögregluvirkvalda, þegar þörf krefur.

6. gr.

Hættulega og óleyfilega hunda, sem ganga lausir utanhúss, skal handsama, við ítrekað brot verði hundinum lógað. Kostnaður við töku hunda skal ákveðinn af sveitarstjórn og að fullu greiddur af eigendum.

Hættulegum hundum er heimilt að lóga þegar í stað.

Aðra hunda er heimilt að afhenda, ef leyfi er framvísað enda verði áfallinn kostnaður greiddur. Að öðrum kosti skal hundinum lógað.

7. gr.

Með brot út af samþykkt þessari skal fara að hætti laga um meðferð opinberra mála og að öðru leyti í samræmi við VI. og VII. kafla laga nr. 109/1984, um hollustuhætti og heilbrigðiseftirlit, með síðari breytingum.

8. gr.

Framangreind samþykkt sveitarstjórnar Breiðdalshrepps staðfestist hér með skv. lögum nr. 109/1984, um hollustuhætti og heilbrigðiseftirlit, með síðari breytingum og 1. gr. laga nr. 7/1953, um hundahald og varnir gegn sullaveiki, til þess að öðlast gildi þegar við birtingu. Jafnframt fellur úr gildi reglugerð um hundahald í Breiðdalsvík nr. 228/1972.

*Ákvæði til bráðabirðga.*

Að liðnum 3 mánuðum frá gildistöku samþykktar þessarar skal fara með alla óskráða hunda skv. ákvæðum 6. gr.

*Heilbrigðis- og tryggingamálaráðuneytið, 18. júlí 1988.*

**Guðmundur Bjarnason.**

*Ingimar Sigurðsson.*